



FM 2015/44

Michael Rosing

28. april 2015

**Naalakkersuinikkut sulinermut aningaasatigut tapiissuteqartarnek pillugu Inatsisartut inatsisaata allanngortinneqarnissaanut Naalakkersuisut UKA15-imi allannguutissatut siunnersuuteqaqqullugit peqquneqarnissaannik Inatsisartut aalajangiiffigisassaattut siunnersuut, § 2 naapertorlugu partiinut tapiissutaasartut ersoqatigiinnerusumik agguataarneqarnissaat anguniarlugu, partiimut qinigaasumut tunngaviusumik tapiissutit 900.000 koruuninut annertusillugit, Inatsisartunullu ilaasortaatitamut ataatsimut tapiissutit 150.000 koruuninut annikillisillugit. Aammattaaq partiit nutaat, partii imaluunniit kattusseqatigiillutik qinigassanngortittut sinnerlugit qinigassanngortittup partiimit tunuarneratigut qinigaaffiup ingerlanerani Inatsisartuni ilaasortaatitaqalersut, partiit Qinersisarnermut inatsimmi § 11, imm. 2-4 naapertorlugit qinigassanngortitsisinnaasutut nalunaarutigineqarnerinit atuutilersumik tunngaviusumik tapiissutinik pisinnaatitaallissapput. Allannguut januaarip aallaqqaataani 2016-imi atuutilersinneqassaaq.**

(Inatsisartunut ilaasortaq Justus Hansen, Demokraatit)

(Siullermeenera)

Uani siunnersuummi tunngaviusumik pineqarpoq nammaqatigiinneq aamma naapertuuttumik agguaaqqinnissaq, qularnaarumallugu politikkikkut partiit assigiimmik periarfissaqarnissaat.

Demokraatini isumaqarpugut pisortat partiinut tapiisarnerat pillugu maannakkut malittarisassani partiit annerit illersorneqartut tamannalu demokratiimi ajornartorsiutaavoq, partiit minnerit unammillernissaminnut ajornerusumik atugaqartitaammata.

Ilumoorpormi politikkikkut partiimik ingerlatsinermi aningaasartuutit assigiingajammata, marluinnarnik aqqanilinnilluunniit inatsisartuni ilaasortaatitaqaralaruilluunniit. Tamanna partiinut aningaasanik tapiisarnermi tunngaviusariaqaralarpoq.



Tamatuma saniatigut nuannersuuvoq una siunnersuut tunngavigalgu politikkikkut partiinut tapiissutini ukiumut 610.000 koruunit sipaarneqartalissammata. Demokraatini isumaqataavugut naapertuilluarneruinnassasoq partiit aamma sipaarfigineqassappata inuiaqatigiit aningaasarliorallartillugit.

Siunnersuut ataatsimiititaliamit susassaqartumit suliareqqinneqartussanngorlugu innersuunneqarpoq.